



DEMOKRATSKA FRONTA

Klub zastupnika Demokratske fronte u Skupštini Kantona Sarajevo

Zastupnik: Sead Milavica

Broj: /19

U Sarajevu, 24.06.2019. godine

BOSNA I HERCEGOVINA

FEDERACIJA BOSNA I HERCEGOVINA

KANTON SARAJEVO

SKUPŠTINA KANTONA SARAJEVO

VLADA KANTONA SARAJEVO

PREDMET: ZASTUPNIČKA INICIJATIVA

Poštovani,

na osnovu članova 106. i 213. Poslovnika Skupštine Kantona Sarajevo ("Službene novine Kantona Sarajevo", broj 25/10, 14/11, 19/11, 7/12, 26/12) prema Skupštini Kantona Sarajevo:

Pokrećem inicijativu prema Vladi Kantona Sarajevo, kojom bi se povećao stepen socijalne inkluzije osoba sa poteškoćama u razvoju, posebice osoba sa intelektualnim teškoćama, prilikom angažovanja na budućim javnim radovima i akcijama, te radnim odnosima na poslovima za koje nisu potrebne posebne vještine i za koje ne postoji velika zainteresovanost, u Kantonu Sarajevo, na minimalno 20% od ukupnog broja otvorenih pozicija.

OBRAZLOŽENJE:

Osobe sa poteškoćama u razvoju su jedna od ekonomsko i socijalno najranjivijih kategorija društva, a na njihovu dobrobit utiče postojanje sistemskih prepreka koje ograničavaju njihovu mobilnost, pristup uslugama, učešće u obrazovanju, tržištu rada i slobodnim aktivnostima, kao i njihovo ukupnu socijalnu uključenost i ekonomsku nezavisnost. Također, pored svega navedenog, osobe sa intelektualnim teškoćama ili složenim potrebama su izloženi stigmatizaciji društva, a to je posebno pogubno za mlade ljude koji spadaju u ovu kategoriju. Kreiranjem posebne kvote od 20% za angažiranje ove kategorije društva, prilikom planiranja i implementacije svih budućih akcija, kao što je nedavna akcija čišćenja Kantona, postiže se niz pozitivnih efekata za sve uključene strane.



Napominjem, da na ovaj način Kanton Sarajevo dobija poštene i vrijedne radnike, koji su zbog visoke motiviranosti spremni uložiti veliki trud prilikom obavljanja povjerenih zadataka, vrlo rijetko su na bolovanju i uz otvoren pristup, postaju izvor optimizma i pozitivne energije u svojoj radnoj sredini. Ovim putem se pokazuje i stepen društvene odgovornosti, koji je do sada izostajao. Sa druge strane, ove osobe se napokon mogu osjetiti ravnopravnim dijelom ovog društva, što i jesu, kao i osigurati određeni stepen vlastite finansijske sigurnosti, i na taj način pomoći svoju porodicu, što pored praktičnih razloga, ima i izuzetno pozitivan efekat na psihološko stanje ovih osoba.

Naravno, u sklopu ove inicijative, potrebno je formirati interesornu radnu grupu, koju bi sačinjavali predstavnici relevantnih ministarstava, javnih ustanova, institucija i nevladinih organizacija, koji bi sve dostupne poslove podijelili po kategorijama složenosti, od vrlo jednostavnih do složenih, kako bi se ovim osobama mogli ponuditi prikladni poslovi, u skladu sa njihovim mogućnostima. Pored toga, radna grupa bi sačinila i obrazac prijave, koji bi uključio opis grupa poslova sa uključenim primjerima, i koji bi osobe sa posebnim potrebama popunjavale samostalno, ili uz pomoć, te označavale na koju grupu poslova se žele prijaviti da obavljaju.

Pored toga, kao jedan od koraka uspješne implementacije predložene inicijative, potrebno je i angažirati posebne radne asistente, koji bi pomagali prilikom učenja obavljanja posla, te vršili posao nadzora nad radom ovih osoba. Na ovaj način se i motivisanim i stručnim osobama, posebno sa visokom stručnom spremom, nudi prilika za zaposlenje.

Uz podršku radnih asistenata koji su prisutni na mjestu obavljanja posla, osobe sa intelektualnim teškoćama uspješno obavljaju mnoge poslove, koje se kreću od jednostavnih poslova, kao što su čišćenje, do dosta složenijih poslova, ovisno o stepenu poteškoće.

Također, svi relevantni budući oglasi i obavijesti trebaju biti posebno upućeni i Službi za socijalni rad, javnim ustanovama koje rade sa osobama sa poteškoćama u razvoju, i svim drugim relevantnim institucijama i nevladinim organizacijama, koji bi ih potom distribuirali svim zainteresiranim stranama.

Uzevši u obzir gore navedeno, smatram da je predložena inicijativa opravdana.

Zastupnik u Skupštini Kantona Sarajevo
Sead Milavica